

eko članak:

## JEDNA KESA, JEDAN GLAS

Nakon duge zime sa snijegom koji nas je iznenadio bjelinom i pokrio znake ljudske nepažnje, sa prvim znacima proljeća, počeli su izvirivati pečati nebrige i nemarnosti. Na svakom ćošku mogu se vidjeti kese pune smeća, prazne flaše i stare stvari, koje već odavno ne služe nikome i ničemu osim saplitanju i gniježdenju sumnjivih životinja. Kontenjeri su puni smeća, tako i treba da bude. Poklopac od smeća, umjesto stvarnog poklopca, koji, uzgred budi rečeno, ja nikada nisam primijetila u našem gradu, ipak, nekad zna da se ospe i pored kontejnera, izazivajući vrlo ružnu sliku ali i šireći neprijatne mirise koji su u zavadi sa proljećnim suncem i temperaturom zagrijanom na čudesnih dvadeset martovskih stepeni.



*Pogled u nedogled*

*Prirode okrajak, nereda red*

Iako živimo u ekološkoj državi, prizor nebrige i zapuštene prirode, okićene kesama i konzervama, čija reciklaža zahtijeva stoljeća..sve je češći u gradu pod Rumijom. Kako zaustaviti nemarnost? Kako promijeniti ljudsku svijest?

Svaka kesa koju bacimo van kontejnera ugrožava život, ugrožava planetu.Svakom kesom ranjavamo zemlju i svakom kesom pokazujemo našu primitivnost i ravnodušnost prema vlastitom životu i pravu na zdrav život naših bližnjih. Naše predivne šume, koje su pluća svakog grada i koje nas, naročito ljeti, štite od nenasosnih vrućina i UV zračenja, takođe su pune smeća. Tužno i porazno.



*Glas za nas  
Voz za spas*

Niko od nas sigurno se nije zapitao da li je bačenom kesom smeća, punom sporo razgradivih ili, još strašnije, nerazgradivih materija, ugrozio i živi svijet? Ubiti život makar jednoj vlasu trave, cvijetu ili ptici, jasno je-znači biti ubica?! Da li zaista želite taj epitet?

Opštinske i druge državne vlasti se ovim problemom ne bave baš pretjerano. Dovoljno je, valjda, da imamo prefix „ekološka,..“! Možda, u novoj predizbornoj kampanji uspijemo progurati slogan: “Jedna bačena kesa, jedan izgubljeni život” i na nju vežemo “Jedna uklonjena kesa, jedan dobijeni glas”!Možda se onda, makar do zvaničnih izbora, na koji trenutak, promijeni svijest!? Ako budemo dovoljno uporni,čitaj glasni ili agresivni, možda neko i razmisli o davanju na usvajanje prijedloga zakona o kažnjavanju lica koje smeće baca van kontejnera!? Možda.Možda se čudo i dogodi!

**Osmani Enera ('97)**

Mentor: mr Tanja Kragulj

JU Srednja poljoprivredna škola, Bar